

Augsburg, 1. Februar 1570

An Theodor Zwinger

UB Basel, Fr. Gr. I 11, fol. 326r.

S. Vt parentes de liberis suis peregrè viuentibus solliciti sunt, ita et ego quid de Isocrate et Demosthene meo, qui mihi liberum loco sunt, fiat, valde scire aueo. Neque Episcopius neque Polycarpus quicquam à nondinis ad me scripserunt: quorum siue supercilium siue negligentiam moleste ferrem, nisi tu me docuisses ὅτι χρή τῶν χαλκογράφων οἵα διδοῦσι φέρειν. Sed tu idem me illud quoque doceas velim, quid et quando ab eis sit expectandum? De commutatione 50 f. apud Herbardum nihil impetraui: ea ipsa fortasse de causa, quod commentariolus de senectute non est ipsi à me inscriptus. Restat igitur, vt pro humanitate tua et mei studio cum D. Luzelmanno agas, vt Francofordiae per Episcopium procuratori meo, bilbiopolae Augustano, eam pecuniam, recepta apacha, numeret. Quòd si Isocratica et gnomologica honoraria accederent, possem iam tandem dotem inopi nepti meae promissam soluere integrum. promisi autem 300 f., de quib[us] adhuc 100 vsuram affini quotannis soluo. ἀλλὰ καὶ ἐνταῦθα φέρειν δεήσει τὰ διδόμενα. Agnosco enim fatum meum et operis et praemijs operarum infelix: ἀντὶ χαρίτων μὲν μῖσος, ἀντὶ δὲ δόξης προπηλακισμοὺς, ἀντὶ δὲ πολυπονίας γλισχρά τε καὶ μικρὰ λημμάτια ὄψε ποτε προξενοῦν. Et me terret eclipsis ☽^{ae} in ♉, prope gradum ♈^{ij} mei τὸν οἰκοδεσπότην τῆς κτητικῆς μου τύχης facta: quam nunc vires suas me vexando exerturam dicunt astrologi: qui vtinam, vt solent, etiam in hoc mentiantur, ac tu potius verus sis vates, qui hunc annum mihi feliciss[imum] auguraris: qualem tibi magno cum faenore reprecor. Tristem hic nuncium de Caelij obitu, ornamenti Academiae vestrae, accepimus. Nuper etiam incidi in Q. Calabrum, a D. Freigio tibi, Hartungo, Xylandro et mihi inscriptum. Is an adhuc apud vos sit, scire cupio, vt per literas gratias illi agam pro honorifico de me iudicio, et amica voluntate, quae mihi gratissima est: gratior etiam futura, si vel breue ad me dare epistolium dignatus esset. Vale vir clariss[ime] et meas nugas curare perge, vt facis. Augustae Cal[endis] Februarij 1570.

Hiero[nymus] Wolfius
Tuus.

Episcopium quaeso mone, vt ne titulum Doctoris addat inscriptioni Demosthenis: ne ambitus reus agar, homo minimè ambitiosus.